

大方廣佛華嚴經隨疏演義鈔卷第二十六

唐清涼山大華嚴寺沙門澄觀述

疏土既不同下第二釋文於中四一躡前生  
起二正釋經文三科據解妨四次第鉤鎖疏  
卷六  
初三者下第二正釋經文釋第一句疏文有  
二一正釋二解妨今初言一切淨穢者此通  
三土唯除法性以言通慧力所成故此即偈  
文智慧神通力如是也言爲物而取擬將普  
應者除自受用皆爲物故疏佛應統之下解  
妨此有二妨一皆名佛土妨謂土有淨穢穢

豈佛土故今答云穢亦佛土三界朽宅屬於  
一人娑婆雜惡居華藏內是我佛土二然就  
佛言之故無國而不淨者通於穢土稱爲淨  
妨此由淨名經中寶積願聞得佛國土清淨  
而佛答云衆生之類是則不據淨穢穢亦淨  
土故生疑云穢名佛土就佛統之穢名淨土  
復據何理故有此答然佛土皆淨所以身于  
見立陵坑坎佛言我此土淨而汝不見言既  
即穢而淨故不思議者即以上義會下偈文  
偈云世尊境界不思議故疏若是法性即本

識等者約如來藏隨緣成立淨穢諸土如三昧品引楞伽說此從通相不易衆生亦不局佛告法爾者即法爾道理如十地說故疏會二文於理可見疏業有善惡下先總釋後淨名下後引證引三經四文淨名有二皆佛國品初云以萬行爲因者經云寶積當知直心是菩薩淨土菩薩成佛時不詔衆生來生其國深心是菩薩淨土菩薩成佛時具足功德衆生來生其國菩提心是菩薩淨土菩薩成佛時大乘衆生來生其國次列六度等故

云萬行爲因二又云衆生之類是菩薩佛土等者亦是此文次云爲法性雖一下雙釋上二疏文有三初隨業成異釋上萬行爲因此是土因二佛隨異類取土攝生釋上文又云衆生之類是菩薩佛土此是土緣三涅槃下別引他經成其初義就第二中亦具引文佛國品寶積獻蓋佛爲現變化淨土相便求其因故初問云願聞得佛國土清淨舉果也唯願世尊說諸菩薩淨土之行微因佛答云衆生之類是菩薩佛土擇也下所以者何菩薩

隨所化衆生而取佛土隨所調伏衆生而取佛  
土釋曰上二句總明取土一向爲物經云隨諸  
衆生應以何國入佛智慧而取佛土隨諸衆  
生應以何國起菩薩根而取佛土釋曰此明  
土異之由下經徵釋云所以者何菩薩取於  
淨國皆爲饒益諸衆生故釋經意云菩薩修  
因取土皆緣衆生若無衆生取土何用此皆  
他受用土及變化土緣故唯識中二土皆以  
利他行成明爲物取故彼經舉喻欲造宮室  
須依空地若無虛空終不能成欲修淨土必

緣衆生若無衆生無修土處疏涅槃微善者  
下別引他經成其初義即二十一經高貴德  
王菩薩品琉璃光菩薩從不動世界而來無  
畏菩薩問佛此土衆生當造何業而得生彼  
不動世界佛以偈答廣列十善一一皆生言  
微善者彼有偈云若於佛法僧供養一香燈  
乃至獻一華則生不動國若爲怖畏故利養  
及福德書是經一偈則生不動國又云造像  
若佛塔猶如大拇指常生歡喜心即生不動  
國是也疏觀經三心者有三種三心第一佛

爲韋提希現淨土竟韋提希願生求因佛言  
欲生彼國當修三福一者孝養父母奉事師  
長慈心不殺修十善業二者受持三歸具足  
衆戒不犯威儀三者發菩提心深信因果讀  
誦大乘勸進行者如是三事名爲淨業佛告  
阿難及韋提希汝今知不此三種業過去未  
來現在三世諸佛淨業止因釋曰若具此三  
何淨不致然以生就佛總名爲生如上引直  
心是菩薩佛土菩薩成佛時不諂衆生來生  
其國第二上品上生文中云若有衆生願生

彼國發三種心即便往生何等爲三一者至  
誠心二者深心三者迴向發願心具足三心  
者必生彼國第三云復有三種衆生當得往  
生何等爲三一者慈心不殺具諸戒行二者  
讀誦大乘方等經典三者修行六念迴向發  
願願生彼國具此功德一日乃至七日即得  
往生釋曰第三三心多同初三句而合初二  
開其後一此上諸心非但得生彼國而爲生  
因亦能成彼淨國得爲修因故觀經云三世  
諸佛淨業正因故今引爲佛國因也疏上三

初一因二緣三因者然因略有二一變化因  
即第一如來通慧二感淨刹因即是第三緣  
亦有二一約境利物衆生爲緣二攝境從心  
皆自識變此中第二義而是真心隨緣變耳  
第六  
疏次四別明有因有緣者如鏡智所成是緣  
變化土因通因通緣佛以生爲緣生以佛爲  
緣疏衆生菩薩共攝一緣者上已總明即是  
直心是菩薩淨土等若菩薩自修直心衆生  
詔曲何由得生是故勸物同修直心故菩薩  
以直心之因取直心之土以應直心衆生爲

同攝一緣來生其國萬行皆然故云隨其行業  
言凡聖同居者即變化土若他受用唯聖所  
居變化之土凡聖同居有二意一就機化故  
二於凡身中初證聖果尚亦爲居之疏三四  
二種他受用土因者略如上引唯識論文唯  
識一向就佛說因今通菩薩謂佛因中修此  
二因成他受用即是佛因二住地菩薩修此  
二因得他受用約菩薩因初地八地地經廣  
說疏勝解印持隨心轉變者勝解以於境印  
持爲性印持萬境隨心轉變疏一善根所流

因中者即圓融修行自他二利無障礙行故得爾也疏其法性土下第三科揀妨難問上之十句舍於四土何以特明三土因耶故爲此釋次復問云四土之外別說圓融應有五土故今答云故其後三但融他四即是我宗  
卷六  
五

非別有體其圓融之因亦如上說又說淨土總有二義一者行淨業爲因感淨相果二以德業爲因感自在淨業行始自凡夫終至十地德業始起不動終至如來故第二別明是行業淨第三融攝是自在淨第一總明具

斯二淨故疏爲三疏又此十事下生鉤鎖偈中疏成唯識下此下之文前已總引今當略釋大圓鏡智相應淨識即果位第八此是依因依此頓變故由昔所修下此是行因從初成佛下辯其果相初明豎長後周圓下明其橫廣疏論云謂平等性智等者上已具引先智後行俱是緣因亦以行為因以智爲緣故云因緣亦上二皆因隨十地菩薩爲緣如上隨所化衆生等變化爲淨土即是果相初地見刹等百三千故名爲小二地即十三地萬

等後後大於前前前前即劣後後漸勝下所引地義並如本品疏又第七偈依中有依下以義料揀成無礙行門此即賢首華藏觀意彼有五門一成立因緣正當此門起具因緣二相狀布列即華藏品風輪香海等三具德圓滿四依正融攝五攝成觀智今疏有二先牒經略明即彼第四二從然其無礙通有十種下即彼第三但解此二自成觀智略無第  
五然彼具德指一香樹亦明十義一此香樹即佛智身德二即轉法輪三事理無礙四悲

智德五難思德六體用無礙七定亂無礙八微細德九佛境界德十緣起無礙德而內外相參以成十門亦不引證今爲順經加減廢立皆引文證而具事理事事無礙疏中有四初總標二諸教說土下立意或是無常者通

大小乘或云心變唯是大乘理事懸隔明非實教三一事理無礙下開門別釋一中引經即第十經偈末句云安住於虛空今但取莊嚴爲事法界爲理無差別言即是無礙二成壞中不引文者義易了故亦是此偈故云一

一刹種中劫燒不思議所現雖敗惡其處常清淨三中經云體相如本等者即第八經釋刹種章偈及後四相入中所引即前偈前半具云以一刹種入一切一切入一亦無餘體相如本無差別無等無量普周遍五相即無礙證文即第七經六清淨珠玉等即第八香水河尚具云清淨珠玉布若雲一切香河悉彌覆其珠等佛眉間相炳然顯現諸佛影今但取初後二句是顯微細之義七隱顯中略不引經以義多故即此中偈隨心造業不思

議一切刹土斯成立即其義也以同處異見故不可思議又形狀偈云一切塵中所現刹皆是本願神通力隨其心樂種種殊於虛空中悉能作釋曰既一塵隨樂種種皆作則隱顯自在也然疏文中略出二種隱顯一染淨隱顯如感娑婆者對華藏而見娑婆則淨隱染顯感華藏者對娑婆而見華藏則染隱淨顯故摩竭提國其地金剛等二明異類隱顯如須彌山形世界一類顯時江河等形即皆隱也長刹顯時短刹則隱餘可例知八重現

無礙亦不引文以華藏世界所有塵一一塵中見法界已頻引故若更引者依住偈云或有國土周法界清淨離垢從心現如影如幻廣無邊如因陀羅各差別等九所引即第八經釋小海中偈十中又下文云即第八經河間樹林偈疏此十無礙下四結釋六相之義略如前說廣如十地別章疏如何廣大下隨難別釋釋第八九有二義釋前通諸教後由無漏下即事事無礙宗故上普賢云一切刹土入我身所住諸佛亦復然汝應觀我諸毛

孔我今示汝佛境界等疏所現國土似彼報故重重而現不離一毛者如十盞燈共照一毛則一毛之上有千重光也準喻思法疏第四刹體中諸教不同下即五教出體釋有二意一則別配八微是小乘唯心是始教法性是終頓二教或一切法是圓教二則通明圓教具於四義頓教唯法性小乘唯八微始終二教通於前三若三各別即二是始教若三無礙性相圓融即是終教故法相宗出體之別一法性土以真如為體二實報土力無畏

等一切功德無漏五蘊以爲體性若攝相歸性亦真如爲體三色相土攝境從心自利後得智爲體故佛地論云最極自在淨識爲相即體相若約相別即四塵爲體四他受用土攝境從心利他後得智爲體攝相歸性亦以真如爲體若約相別亦是四塵五變化土同前他受用體是知始教具用三法圓教則以性融相相無礙故通一切法則事事無礙而爲其體是故疏云今皆具之次引經具收後融無礙疏第五段刹莊嚴中至或寶爲嚴

等者然莊嚴有三即名三淨一處所淨即衆寶爲嚴二住處衆生淨即人寶爲嚴三法門流布淨即以法爲嚴對文可知疏第六段明刹消淨疏文有四一總標大意二別顯其相三對教揅定四對文揅濫今初言唯約淨者以言清淨故不同形等通於染淨言行致者即生公意彼淨名注云行致淨土非造之也造於土者衆生之類矣十四科中釋致義云問云何致而非得耶答夫稱致者體爲物假雖獲非已釋曰謂因他而得故名爲致謂佛

修萬行直趣真極不取色相他受用等因他衆生遂以大悲爲物取土故云行致既因萬行而致於土必招淨也疏然淨有二下第二別顯其相展轉開之乃成四重皆以方便爲因清淨爲果第一對中言以六行為方便者謂厭下苦麤障欣上淨妙離故以色無色界而爲淨土疏此復二種下第二對二乘淨土玄中已明疏然出世上上淨中下第三對言仁王經等者即菩薩行品波斯匿王讚佛此前一偈半云正覺無相遍法界無生忍盡智

圓明寂照無礙真解脫大悲應現無與等湛然不動常安隱光明遍照無所照三賢十聖住果報唯佛一人居淨土在文易知若瓔珞經亦云佛子有土名一切賢聖所居之處是故一切衆生一切聖賢各有自居果報之土若凡夫衆生住五陰中爲正報之土山林大地名爲依報之土初地聖人亦有二土一實智土前智爲住後智爲土二變化淨穢經多劫數量應現之土乃至無垢地土亦如是一切衆生乃至無垢地盡非淨土住果報故唯

佛獨居中道第一法性之土是故我昔在普光堂廣爲一切衆生說淨土門以上二經唯佛爲淨疏未極之中下第四對也言未絕色累者即生公十四科淨土義云夫未免形累者八地已前在生空觀即淨土出即居穢土八地已上長在生空即長在淨土故須託土以自居之八地已上未絕色累照體獨立神無方所土復何爲意云八地淨無生忍得色自在捨於分段故云未絕色累一切世間出世間心悉不現前故云照體獨立稱性普周

故云神無方所神即心神易云神者妙萬物而爲言者也故神無方而易無體旣無色累故其土相難以名目疏七地已還等者未出三界者依直往者未捨分段故無漏觀智有間斷者即六地已下若至七地觀無有間依十地經六地已下爲染八地已上爲淨七地亦名中間亦可名染亦得名淨或非染非淨今取染義故非純淨疏若依瑜伽下第三對教揀定可知疏然淨方便下第四對文揀濫於中有二先對此文上來四對皆約清淨爲

果方便爲因今以義通方便亦果親近善友  
即是方便今得人寶爲嚴則兼於果故極樂  
等土諸上善人俱會一處是等流果也疏然  
望莊嚴下第二對前文揀也如莊嚴中云或  
以說一切菩薩功德莊嚴與此增長廣大功  
德雲遍法界故文同又彼偈中多舉因顯果  
與此長行同此云慈悲廣大遍衆生以此莊  
嚴諸刹海與莊嚴同起具因緣諸淨刹因與  
此長行修淨因同故爲此揀疏文有二一明  
門別謂所用雖一用處不同猶如說法在布

施門名爲法施在智慧門名爲方便等疏又  
起具下更以別理揀於二門則具緣是通此  
處則局故前疏云唯約淨也對於莊嚴則多  
少不同如多藥和合從疆得名定中有慧但  
資於定慧中有定但名般若等故云彼多約  
果此多約因從前多修善者亦從多少前則  
以因對果論其多少此則唯就因中自有多  
少前云菩薩無邊功德海及普賢行願諸佛  
子等衆生劫勤修習此多修善也今乃文云  
淨修廣大諸勝解成就方便清淨力即治惡

多文顯可知疏如善財夜神處說即七十三  
經大願精進力夜神善財初見起於善知識  
同己等十心便得佛刹微塵數行所謂同念  
心常憶念十方三世佛故同慧心分別決定  
一切法故等廣如彼說此下數段皆如十地  
經文疏前半方便後半清淨者以各下句有  
方便清淨言故言皆上句果下句因者從多  
分說則方便爲因清淨爲果若從通說俱通  
因果方便約因善巧出生於土方便約果依  
正業用是淨土相清淨約因離諸障蓋清淨

約果無有三惡八難等故疏初二隨彼類  
者如佛出娑婆但可丈六若生極樂無量由  
旬不可以無量由旬之如來以化三尺身衆  
生丈六之佛化萬丈之人壽亦然矣居於此  
刹不滿百年彌陀人民壽比皆無量然此一對  
亦通化機多少次一緣廣狹者緣廣則刹廣  
如文殊普賢之邦緣狹則刹狹如迦葉光德  
之國四宜聞三則祕一乘之妙寶宜聞一則  
廢羊鹿之小車五根熟者化多如釋迦之化  
未熟則化少如須扇多如來亦是因中緣廣

狹故疏一念與劫下釋唯心方便之義然一  
念與劫並由想心此有二意一者由有想念  
即有剎那積此剎邪終竟成劫心想若滅生  
死長絕此順經文二者一切境界皆依妄念  
見六  
而有差別若離心念則無一切境界之相此  
十二

順經意成唯心觀是故疏云心想不生長短  
安在無長無短即心體清淨是以經言以一  
方便皆清淨也此約真性故第三句是不壞  
相義相性無礙剎海義也疏二唯約住劫之  
中居人善惡復有二義一約衆生引因所得

二約菩薩居中作用心純善故染淨交徹耳  
疏一遇惡緣故淨變爲染即是劫中染汙衆  
生住故七十二經云往昔此城邑大王未出  
時一切不可樂猶如餓鬼處衆生相殺害竊  
盜縱姦俠雨舌不實語無義麤惡言僥倖他  
財物瞋恚懷毒心邪見不善行命終墮惡道  
以是諸衆生愚癡所覆蔽住於顛倒見上惡  
緣也天旱不降澤以時無雨故百穀悉不生  
草木皆枯槁泉流亦乾竭大王未興世河池  
悉枯涸園苑多骸骨望之如曠野即劫變也

疏粳米自然生等即是上經次文云大土昇寶位廣濟諸群生油雲被八方普雨皆充洽乃翻十惡成十善也其中翻偷盜云往昔諸衆生貧窮少衣服以草自遮蔽飢羸如餓鬼大王既興世粳米自然生樹中生妙衣男女皆裝飾即其事也疏三即地前者信解是地前通稱亦名勝解行住未證真如但依解力而修行故疏或以多莊嚴而嚴一刹者如第五迴向即願普攝十方三世所有佛刹一切莊嚴而嚴一一刹一切亦然至登地竟能如

願成如八地十地中說言或以一嚴而嚴多刹者第二迴向云以一莊嚴嚴一切亦不於法生分別如是開悟諸衆生一切無性無所觀如上口光召衆者即第六經其諸菩薩四至會中現自在用如是坐已其諸菩薩身毛孔中一一各現十世界海微塵數一切寶種種色光明一一光中現十世界海微塵數諸菩薩皆坐蓮華藏師子之座此諸菩薩悉能遍往一切法界諸安立海所有微塵彼一塵中皆有十佛世界微塵數諸廣大刹一一

刹中皆有三世諸佛世尊此諸菩薩悉能遍  
往親近供養等即嚴微塵中刹也疏佛滅度  
百年乳不及水者育王經說育王常供養諸  
聖僧上座食乳稍多育王白言乳若多食恐  
生疾患上座云此乳有何力不及世尊在世  
時水今佛滅度一切精淳皆沉地下育王願  
見佛在時水上座展手地下取水育王嘗之  
實過於乳明知福人滅矣能事隨滅百年上  
爾況今去聖將二千年尤更淡薄況於滅極  
鐵爲上嚴粧爲上味如起世等經說疏八如

彌勒來者即彌勒下生經說佛告舍利弗云  
四大海水以漸減少三千由旬是時閣浮提  
地長十千由旬廣八千由旬平坦如鏡名華  
輒草遍覆其地種種樹木華果茂盛其樹悉  
皆高三十里城邑次比雞鳴相及人壽八萬  
紀六歲智慧威德色力具足安隱快樂有一大城  
名趣頭末底長十二由旬廣七由旬其城七  
寶上有樓閣戶牖軒窓皆是衆寶真珠網覆  
塹廣十二里街巷道陌處處皆有明珠之柱  
處處皆有金銀之聚便利不淨地裂受之受

已還合亦無衰惱水火刀兵及諸飢饉蟲害之事園林池沼八功德水衆華異香皆悉盈滿不生草穢一種七種味甚香美增色力身等廣如彼說疏淨名足指案地者即佛國品說隨其心淨則佛土淨爾時舍利弗承佛威神作是念言若菩薩心淨則佛土淨者我世尊本爲菩薩道時意豈不淨而是佛土不淨若此佛即答云我此土淨而汝不見爾時世尊即以足指案地即時三千大千世界若干百千衆寶莊嚴土一切大衆歎未曾有而皆

目見坐寶蓮華等是也疏法華三變淨土者即寶塔品大樂說請開塔戶佛言須集分身大樂說請集分身佛世尊放光遠召爲欲受分身佛故一變娑婆二於八方各更變二百萬億那由他國土皆令清淨坐佛不足第三更變二百萬億那由他國土皆令清淨故云三變疏謂前九辯諸世界約相不同至皆周遍故皆釋標名於中有三一約性相對相則有差性則無差二又約權設下約權實相對實則無差三又皆是諸佛之所用故下收十五

差與無差皆歸果用前之二對性相權實二不相即今則融即言無差之差者是圓融上之行布也差之無差者是行布上之圓融也若離圓融則無可差別也若離差別無可圓融如攬別成總非離別外而有此總引法華經但明二不相離由依此義下顯十八圓滿由此而成疏盡海之塵一塵一刹已是含攝之義者以經云一一世界海中有世界海微塵數世界無差別謂一箇世界海還有世界海微塵數世界則義當一塵是一世界竟唯

就此一句已顯融攝釋無差別義善成矣若界界相望論無差者無差全少今十句中句句各有世界海塵則一海之中已有十世界海塵數無差故須融攝思之疏而前但約平漫無差者即長行云一一世界海中所有佛威力無差別今乃皆云一一塵中無量光等即是重疊無差別也疏若云約共同事下結彈古人謂經舉十事皆約融攝若依昔義何以不言一一世界海中染淨無差別一一世界海由衆生受苦無差別以世界海中皆有

染有苦故故疏結云豈世界海中都無此耶今經不言明知約融攝無差別耳世界成就品竟

華藏世界品第五

盡第二會初如來名號品疏梵本具云

等者梵云拘蘇磨華藏也多羅藏也票訶莊嚴也阿楞

伽嚴具嚕迦也駄駄都世界也三牟達羅海也鉢履輸

陀云遍清淨也懼曩功德也三牟達羅海也阿羅婆上

婆光明光明也鉢履勿多品也此云華藏莊嚴嚴具世  
界海遍清淨功德海光明品然疏文有四一  
舉梵名二譯者嫌繁下申其義釋三其梵本

云下釋前梵本四約事可爾下覈其本源不爲此釋豈委利海之興由三宗趣言有十德者前品已引四文疏初明華藏因果自體者然第二安布莊嚴亦是果相故應對果分因總爲二段謂先明刹因後彰果相以第一段中長行具有因果偈中雙明因果故合於因屬自體中疏謂指此刹海是我本師下疏文二先通釋經文後隨難別釋今初疏不唯勝觀釋迦等者俱舍論第十八說於三無數劫各供養七萬又如次供養五六七千佛三無

數劫滿逆次逢勝觀然燈寶髻佛初釋迦牟尼釋曰此三偈中初偈明供養佛數謂初無數劫供養七萬五千佛第二無數劫供養七萬六千佛第三無數劫供養七萬七千佛後頌意明供養何佛言逆次者從第三無數劫

向前以明謂第三無數劫滿逢勝觀佛第二無數劫滿逢然燈佛第一無數劫滿逢寶髻佛最初發心逢釋迦牟尼佛發誓願言願我當作佛一如今世尊彼佛世尊末劫出世時住千年今我如來一一同彼故今疏云不

唯勝觀者舉第三阿僧祇劫滿佛言釋迦者舉初發心之佛而言等者乃有三義一等然燈寶髻二等所供佛數三等餘教所明設言供養三十六恒三十八恒佛等皆未足爲多也疏不唯淨一無生等者如智論說五華供養然燈得無生法忍故金剛經云若有少法可得然燈佛則不與我授記等無法可得是無生相而言等者等餘法門俱含頌云但由悲普施被折心無忿讚歎底沙佛次無上菩提六波羅密多於如是四位一二又一二如

次修圓滿釋曰初之四句即是四位初位一滿謂普施成檀次位二滿謂尸及忍被折不報故能滿口由內無忿故成於忍第三位中但一度滿謂精進度第四位中定慧雙滿故云一二復一二等言底沙者此云圓滿讚佛偈云天地此界多間室逝宮天處十方無丈夫牛王大沙門尋地山林遍無等七日七夜忘下足歎底沙故超於彌勒九劫先成佛智論之中亦同此說故六度滿前後不多今經一一佛所淨修世界海微塵數大願況於

多佛況多劫耶故結云由上三重故云深廣疏然瑜伽起信下第二隨難別釋即重釋三祇約三乘一乘以通言該通十方者對上一方化儀言及樹形等界者對上一類世界且如娑婆一劫方知安養得爲一日則安養世劫六十八界乃經三無數日月更方策裝幢刹未經歲月況於後後以劫爲日之刹耶是則不可以此一方一類定於成佛時劫之數二異類刹者即於一界即具諸界互不相見時劫亦殊安知脩短故朝菌不知晦朔沉識春秋耶況

於大椿之歲耶言寶雲經者經云善男子菩薩不能思議如來境界如來境界不可思議但為淺近衆生說三僧祇修習所得菩提而實發心已來不可計數賢首釋云不可計者不可計數阿僧祇也義分齊云始教三祇不

同小乘十數之此即倍倍數之仍說百劫修相好等智度論破此別修相好不許三祇之外別修即是實教之意然實教之意自有二義一定三僧祇一方化儀故又是實佛故起信云或示超地速成正覺以爲怯弱衆生

故或說我於無量阿僧祇劫當成佛道以爲懈慢衆生故能示如是無量方便不可思議而實菩薩種性根等發心則等所證亦等無有超過之法以一切菩薩皆經於三阿僧祇劫故斯則定也二者不定復有二意一爲通餘類世界故如勝天王說即前樹形等刹是二據佛寶德無限故如寶雲經若瑜伽說有二種無數劫一者日夜月半月等方便顯時無量故二者如常說若依初義經無量劫若依後義但三僧祇然依此釋不同寶雲寶雲

不言爲淺近衆生說於大劫爲於深勝說日月劫明知意殊疋則瑜伽亦是一方所宜說耳疏又時無別體下別教一乘融攝以說如毗目仙人執善財手時經多劫處歷無邊故不可以長短思也若顯超勝一生頓圓若約甚深多劫莫究故云不可定孰貴在入玄疏第二諸佛子下彰果體相疏文有四一總相生起二彰其分量三科釋經文四用義通局疏然所依剎量下第二彰其分量言大小之化者如梵網經周而千華上復現千釋迦即

大化也一華百億國一國一釋迦即小化也小化唯一四洲大化總該百億且依一相等者且依一種義相不壞邊表有蓮華外別佛刹海等寶則稱性橫不可尋故云法界無差別若以性融相則一塵中法界無量疏然準下別顯下第三科釋經文言應有十事者以文廣釋十事故此中長行略標列故是以古德一品之中先分土因就果相中即分十段今不依者以下六事各有長行偈頌而前四事同一長行故科十段於文不便先科爲三於

第一華藏自體中長行之內方爲四耳疏然  
其刹因下第四明用義通局已見上文者即  
起具因緣中通義易知故示別相列中疏風  
力遙持者古有二釋一云一重風輪持一重  
物疏以出現品中有十風輪持欲色等皆是

卷六

遙持故今案定疏所持香海下疏有二釋一

約事釋二又藏識下約表於中又二一約衆  
生二又佛性名水下約通生佛佛性即是真  
法性故故此品初海表三義今舉其二略不  
說悲涅槃亦云有人聞香即第七經至問明

品當具引之疏又所發萬行下上約事釋此  
約表法但通相表行若別說者略示十德表  
於十度一開敷鮮榮以表施度二自性無染  
以表戒度三香氣芬馥四寶莖堅固五寶葉  
扶疎六寶藥光幢七相巧成就八含藏蓮子  
九寶臺堅住十普放光明下八如次顯於八  
度疏宿因現緣經離頌合等者此中詔長行  
爲經以取長行綴葺略說所應說義別相修  
多羅故言經離頌合者宿因即前願因深廣  
現緣即前風持香海等此二離明言頌合者

初偈頌總前半宿因後半現緣第二偈三句宿因第四句是現緣故疏所成果相經略頌廣者長行云華藏世界海住在其中者即所成果相此文則略以十偈之內皆有果相故云頌廣疏三現緣風輪經廣頌略者經列十紀六種風輪偈中但云風力所持無動搖耳疏四山地海樹經有頌無者長行云金剛輪山周而圍繞地海衆樹各有區別此經有也頌無可知上言有四者但有四例唯廣略一種乃成一對離合有無但成一例耳若成對者應

須經合頌離經無頌有方成三對耳餘四例二對此中則無下頌則有疏是無邊之邊不礙理而即事等者意明理無分限總曰無邊事有分限故名有邊若理成事理性全隱則無邊即邊若會事歸理事相全盡則邊即無邊今則不爾不失理而事現云無邊之邊不壞事而理顯云邊之無邊此是事理無礙義不是相即相作之義思之疏但云諸嚴下此句稍長故牒釋云即從諸莊嚴具下是第九句摩尼妙寶下皆第十句疏準下利種及梵

本皆有十者以中一海管十海而此十海一  
道布列結有不可說佛刹微塵數香水海十  
道皆然一海一種故有十不可說也言下標  
種處亦然者標云諸佛子此不可說佛刹微  
塵數香水海中有不可說佛刹微塵數世界  
種釋曰此即標種處無十字亦例合有疏芬  
陀利即白蓮華者即唐三藏等諸師所翻而  
言亦是正敷榮時者即付公意故叡公法華  
序云華有三時之異華而未敷名屈摩羅凋  
而將落名迦摩羅處中盛時名芬陀利生公

亦云器像之妙莫踰蓮華蓮華之美榮在始  
敷始敷之盛則子盈於內色香味足謂之芬  
陀利意亦同也今存二譯各是一義梵語多  
舍故兩存耳疏即隨一心同時相應功德  
流注者大海既喻藏識小海復表種子二皆  
心王故河表馳大同時心所謂善十一遍行別境  
二千福河流注心地也疏嚴中嚴事下釋第  
二辯嚴也疏中先略釋後結十句可知今先  
示十句後示別釋十句者一岸體金剛二淨  
光下摩尼嚴岸三常現下現佛光色四及諸

下出同類音五其河下旋渡出影六摩尼下網鐸垂覆七諸世界下總顯多嚴八摩尼寶雲下寶雲覆上九復出妙音下浪出妙音十其香水下水湧光雲以文易知故長行不出但偈中具示今示略釋者疏云寶體是初句寶嚴是第二句聖靈游集即三四五句光雲相映即六八與十萬像浮輝即七九二句疏如劖葉林者其林樹葉猶如刀劖下即傷人言如天意樹者涅槃四十二問中當第二十四問云云何觀三寶猶如天意樹言天意樹

者隨天意轉故至第九經方始答之云復次善男子如菴羅樹及閻浮樹一年三變有時生華光色敷榮有時生葉滋茂蓊鬱有時凋落狀如枯死善男子於意云何是樹實爲枯死不耶不也世尊善男子如來亦耳於三界

卷六

三三

中示三種身卷六有時初生有時長大有時涅槃而如來身實非無常釋曰意明三寶隨物轉變而實常存如天意樹隨天意轉而實不死隨天之意明是善業矣言男女林者即楞伽第一百六問云何男女林一百七問云何訶

梨勒阿摩勒解曰謂令觀世間如男女林等  
依立世阿毗曇論第一云閻浮提林外有二  
林一名訶梨勒二名阿摩勒此二林南復有  
七林中有人林是人林中果形如人如閻浮  
提聖人三種若男子十六歲如女十五歲莊  
嚴具足狀如行嫁是人林果可愛如是其子  
希形如人頭髻未離欲者見此果子便生愛  
心諸外道等有離欲人若見此果即失禪定  
欲心還生其子熟時唯鳥競食鳥食之餘殘  
落於地如尸陀林甚可厭惡諸退禪定者

見是相已深生厭離還得本定意表世間男  
女如林所見榮飾悉皆如幻與此無別遍計  
所執妄謂之實菩薩觀之都無所有故楞伽  
云觀諸衆生如死屍無知以妄想故見有往  
來若離妄想如彼死屍無鬼入中云爲自在

故有經說菩薩所見世間資生無非實相此  
之謂矣疏後三結嚴所因疏文有三初總明  
二然此三偈下別釋三顯華嚴下結歎二中  
示難思相總有六重六重之中皆通一偈而  
各取一句中言又此四句各是一義如第一

偈初句所現之境二能現之處三所現相四能現之因下二例然其第一重科棟初句所能現不同三偈各一世間而初偈是初句次偈是第二句後偈是第二三兩句言影略其文者謂隨一能現能現三世間今各舉其一故云影略非但此義六重皆影略疏又初明二果能現下第二重約現處明矣初偈是第二句後二偈皆第一句疏又初明佛力下第三重約能現因差各顯一因皆第四句疏又初果後因願通因果者是第四重亦約現因明

第六

三言

無重釋第四句而約因果不同疏又初自下第五亦約能現因句亦第四約二利不同疏初明即性無性下第六重約所現性相明差三偈皆第三句以各見不同同體無來等故此之一義更須解釋謂若順上釋既從佛力等因故所現之體即無生等二者此句亦是能現由體無生故現而叵取稱性而來故無來去隨機隱顯各見不同疏應成四句者文出二句三一因一果釋文已用四多因多果隨修一行無德不招廣如問明及昇兜率品

四句相融故一一難思疏一者令多等者第  
四偈一切刹海咸周遍是令周給他也第二  
偈中靡暫停第三偈中恒聞見是令常也第  
三偈中其音美妙是令妙也第十偈中無等  
第六  
無生無有相是稱性也第八偈能於一切微  
塵中普現其身淨衆刹及第九偈一刹那中  
十五  
悉能現皆自在也疏後半悲應即他受用及  
變化淨一偈之中四工具矣疏標二章者謂  
種及刹下疏文有三一總釋徵名二欲明世  
界下雙顯名相三而言世界下對難釋通於

中二初通世界無邊難後若爾下釋種無體  
難雖依種類下釋通於中先正釋二結成今  
初前爲成海故取種類略無別體今別喻蜂  
窠以彰有體蜂孔如刹一窠如種則顯魚龍  
乃成分喻疏即依後義下二結成也先會同  
晉經成種性義種有二義一類二性以禾喻  
種以粒喻刹禾能生穀故有性義二恐濫下  
顯今經意亦是通難難云若有種生之義何  
不依昔爲世界性故爲此通則種兼二義今  
經存之疏今初也然此十門刹種之異下疏

文分四一顯種所依二對前會釋三隨文別解四別示義門疏所列十事下二對前會釋於中亦四一總顯不同二若別別相望下互出同異三皆顯十下彰互所以四何以起真前有此無下牒問釋成聖即問也問意云一  
卷六

變正是果相正辨果住何得全無今云無者清淨方便亦是約因又不通染今則通染又不語因佛住約人今此辯刹故亦無之劫住轉變此二豎明今語現住亦非此要故略不說疏然與前同下第三隨文別釋但解五句言若圓滿方所等者釋此五句皆是十八圓滿中意次下當明此中每句各二義方所二下結云餘可思準者即是結例餘四但用何等世界住言總通五難劫住即是果起具是因此通易了餘四猶難謂清淨佛出劫住轉

圓通故進入自受用下該變化疏依門趣入等者彼有事門即如向說二約法爲門今但出此又互相現入者是約此宗以辯門義並

如下說分齊分二隨宜即他受用等約佛即

自受用土行列與下第十加持各約事法分

爲二問圓滿方所云無處不有圓滿分齊十

方無際二相何別答若識隨宜方所分齊即

知圓滿二相不同謂隨宜方所者此之淨土

十方之內爲在何方如極樂在西妙喜在東

等言分齊者此之淨土廣狹云何或等一娑

婆或等百千是分齊也是則圓滿方所明無處不有者即遍在一切處也分齊云十方無際者量周法界也

大方廣佛華嚴經隨疏演義鈔卷第二十六

卷六

音釋

炳補未切 趕許劣塗七體切 繩魯敢切

朝明也 菌菌巨隕切 攢偷蕩切

地葦也

永樂北藏

華嚴經隨疏演義鈔

第一七二冊